

四庫全書薈要

• 乾隆御覽本

集部

欽定四庫全書薈要

集部

詞綜卷十二



詳校官編修臣繆晉

詞綜卷十二

翰林院檢討朱彝尊編

宋詞六十三首

趙鼎

四首

岳飛

一首

李彌遜

一首

朱翌

一首

張元幹

八首

洪皓

一首

呂本中

三首

鄧肅

三首

劉子翬

一首

張掄

一首



朱敦儒

十三首

康與之

五首

吳億

一首

曾覲

三首

閻蒼舒

一首

左譽

一首

陸凝之

一首

楊元咎

五首

阮閱

一首

侯寘

二首

曾慥

一首

曾惇

一首

朱雍

一首

姚進道

一首

劉之翰

一首

江緯

一首

趙

鼎

字元鎮聞喜人崇寧初進士累官尚書左僕射同中書門下平章事兼樞密使卒贈太傅

謚忠簡追封豐國公有得全居士集詞一卷

黃叔暘云趙公中興名相詞章婉媚不減花間

蝶戀花

盡日東風吹綠樹向晚輕寒數點催花雨年少淒涼天
付與更堪春思縈離緒臨水高樓携酒處曾倚哀絃
歌斷黃金縷樓下水流何處去凭欄目送蒼烟暮

點絳脣

香冷金爐夢回鴛帳餘香嫩更無人問一枕江南恨
消瘦休文頓覺春衫褪清明近杏花吹盡薄暮東風緊
又

惜別傷離此生此念無重數故人何處還送春歸去

美酒一杯誰解歌金縷無情緒淡烟疎雨花落空庭暮

滿江紅

丁未九日南渡
泊舟儀真江口

慘結秋陰西風送絲絲雨濕凝望眼征鴻幾字暮投沙
磧欲問鄉關何處是水雲浩蕩連南北但脩眉一抹有

無中遙山色 江上路天涯客腸已斷頭應白空搔首
興歎暮年離隔欲待忘憂除是酒奈酒行有盡愁無極
便挽將江水入尊壘澆胸臆

岳飛

字鵬舉湯陰人累官少保樞密
副使封國公謚武穆追贈鄂王

小重山

昨夜寒蛩不住鳴驚回千里夢已三更起來獨自遶階
行人悄悄簾外月朧明 白首為功名舊山松竹老阻
歸程欲將心事付瑤琴知音少絃斷有誰聽

李彌遜

字似之吳縣人大觀初登第遷起居郎試中書舍人再試戶部侍郎以爭和議忤秦檜乞

歸田隱連江西
山有筠溪集

菩薩蠻

江城烽火連三月不堪對酒長亭別休作斷腸聲老來
無淚傾 風高帆影疾目送舟痕碧錦字幾時來薰風
無鴈回

朱翌

字新仲龍舒人政和中進士
歷官中書待制有滌山集

點絳脣

梅

流水泠泠斷橋橫路梅枝亞雪花飛下渾似江南畫

白壁青錢欲買春無價歸來也風吹平野一點香隨馬

張元幹

字仲宗長樂人紹興中坐送胡銓及寄李綱詞除名有歸來集蘆川詞一卷

賀新郎

送胡邦衡待制赴新州

夢繞神州路悵秋風連營畫角故宮離黍底事崑崙傾
砥柱九地黃流亂注結萬落千村愁緒天意從來高難
問況人情易老悲難訴更南浦送君去涼生岸柳摧
殘暑耿斜河疎星淡月斷雲微度萬里江山知何處回

首對牀夜語鴈不到書成誰與目盡青天懷今古肯兒
曹恩怨相爾汝舉大白聽金縷

石州慢

寒水依痕春意漸回沙際烟濶溪梅晴照生香冷蕊數
枝爭發天涯舊恨試看幾許消魂長亭門外山重疊不
盡眼中青是愁來時節情切畫樓深閉想見東風暗
消肌雪辜負枕前雲雨尊前花月心期切處更有多少
淒涼殷勤留與歸時說到得再相逢恰經年離別

柳梢青

海山浮碧細雨絲風新愁如織慵試春衫不禁宿酒天涯寒食歸期莫數芳辰誤幾度回廊夜色入戶飛花隔簾雙燕有誰知得

點絳脣

秋社前一日溪光亭大雨作

山暗秋雲暝鴉接翅啼榕樹故人何處一夜溪亭雨夢入新涼只道消殘暑還知否燕將雛去又是流年度

又

春曉輕雷采蘋洲上清明雨亂雲遮樹黯澹江村路
今夜歸舟綠潤紅香處遙山暮畫樓何許喚取潮回去

又

皇洛濱筠
溪二老

清夜沉沉暗蛩啼處簷花落乍涼簾幕香繞屏山角

堪恨歸鴻情似秋雲薄書難託儘教寂寞忘了前時約
怨王孫

霽雨天迥平林烟暝燈閃汀沙水生釣艇樓外暗柳誰
家亂昏鴉相思怪得今番甚寒食近小硯魚箋信屏

山半掩微醉獨倚闌干恨春寒

清平樂

明珠翠羽小綰同心縷好去吳淞江上路寄與雙魚尺
素蘭橈飛取歸來愁眉待得伊開相見嫣然一笑眼

波先入郎懷

洪皓

字光弼樂平人第進士建炎中以徽猷閣待
制假禮部尚書為通問使還除徽猷閣直學
士提舉萬壽觀兼權直學士院忤秦檜謫濠
州團練副使安置英州後徙袁州卒謚忠宣

江梅引

天涯除館憶江梅幾枝開使南來還帶餘杭春信到燕
臺準擬寒英聊慰遠隔山水應銷落赴愬誰空恁遐
想笑摘藥斷回腸思故里謾彈綠綺引三弄不覺魂飛
更聽胡笳哀怨淚沾衣亂插繁華須異日待孤諷怕東
風一夜吹

呂本中

字居仁中國公公著曾孫好問子授承務郎
紹興六年賜進士累遷中書舍人兼權直學
士院秦檜諷御史劾罷之提舉
太平觀卒謚文靖有東萊集

南歌子

驛路侵斜月溪橋渡曉霜短籬殘菊一枝黃正是亂山
深處過重陽旅枕原無夢寒更每自長只言江左好
風光不道中原歸思轉淒涼

減字木蘭花

去年今夜同醉月明花樹下今夜江邊月暗長堤柳暗
船故人何處帶我離愁江外去來歲花前還似今年
憶去年

清平樂

柳花

卷十二
柳塘新漲艇子操雙槳閒倚曲樓成悵望是處春愁一
樣 傍人幾點飛花夕陽又送樓鴉試問畫樓西畔暮
雲恐近天涯

鄧

肅

字志宏延平人高宗朝官左
正言所著有耕櫛集詞一卷

南歌子

雲繞風前鬢春開鏡裏妝鳳屏清晝裊龍香淺畫娥眉
新樣遠山長 比翼曾同夢雙魚隔異鄉玉樓依舊暗
垂楊樓下落花流水自斜陽

長相思

一重溪兩重溪溪轉山回路欲迷朱欄出翠微
梅花飛雪花飛醉卧幽亭不掩扉冷香尋夢歸

生查子

執手兩潸然情極都無語去馬更匆匆一息迷回顧
孤館得村醪一醉空離緒酒醒却無人簾外三更雨

劉子翬

字彥冲崇安人以父給任授承務郎通判興化軍辭歸武夷山學者稱為屏山先生有屏

山集

驀山溪

九日

浮烟冷雨此日還重九秋去又秋來但黃花年年依舊
平臺戲馬無處問英雄茅舍小竹籬疎兀坐空搔首
客來何有草草三杯酒一醉萬緣空休貪他金印如斗
病翁老矣誰共賦歸歟茭隴麥網溪魚未落他人後

張

掄

字才甫南渡故老
有蓮社詞一卷

霜天曉角

曉風搖幕敲枕聞殘角霜月到窓寒影金猊冷翠衾薄

舊恨無處著新愁還又作夜夜單于聲裏燈花共珠淚落

朱敦儒

字希真一作希直洛陽人以薦起賜進士出身為秘書省正字兼兵部郎官遷兩浙東路提點刑獄上疏乞歸居嘉禾

晚除鴻臚少卿有樵歌三卷

張正夫云希真賦月詞插天翠柳被何人推上一輪明月自是豪放賦梅引橫枝銷瘦一如無但空裏疎花數點語意奇絕如不食烟火語汪叔耕云希真詞多塵外之想雖雜以微塵而其清氣自不可泛黃叔暘云希真東都名士詞章擅名天資曠遠有神仙風致

念奴嬌

別離情緒奈一番好景一番悲感燕語鶯啼人乍遠還是他鄉寒食桃李無言不堪攀折總是風流客東君也自怪人冷淡踪跡花艷草草春工酒隨花意薄疎狂何益除却清風并皓月脉脉此情誰識料得文君重簾不卷且等閒消息不如歸去受他真個憐惜

朝中措

當年挾彈五陵間行處萬人看雪獵星飛羽剪春遊花

簇雕鞍 飄零到此天涯倦客海上蒼顏多謝江南蘇
小尊前怪我青衫

十二時

連雲衰草連天晚照連山紅葉西風正搖落更前溪鳴
咽 燕去鴻歸音信絕問黃花又共誰折征人最愁處
送寒衣時節

好事近

春雨細如塵樓外柳絲黃濕風約繡簾斜去透窓紗寒

碧 美人慵剪上元燈彈淚倚瑤瑟却卜紫姑香火問
遼東消息

又 漁父

搖首出紅塵醒醉更無時節生計綠簑青笠慣披霜衝
雪 晚來風定釣絲閒上下是新月千里水天一色看
孤鴻明滅

又

漁父長身來只共釣竿相識隨意轉船回櫂似飛空無

跡蘆花開落任浮生
長醉是良策昨夜一江風雨都
不曾聽得

又

撥轉釣魚船
江海儘為吾宅
恰向洞庭沽酒
却錢塘橫笛
醉顏禁冷
更添紅潮
落下前磧
經過子陵灘
畔得梅花消息

又

短棹釣船輕
江上晚烟籠
碧塞雁海鷗
分路占江天
秋

色錦鱗撥刺滿籃魚取酒價相敵風順片帆歸去有
何人留得

又

失却故山雲索手指空為客尊菜鱸魚留我住鴛鴦湖
側偶然添酒舊葫蘆小醉度朝夕吹笛月波樓下有
何人相識

點絳脣

客夢初回卧聽吳語開帆索護霜雲薄淡淡芙蓉落

畫舫無情人去天涯角思量著翠蟬金雀別後新梳掠
雙鷺鸕

拂破秋江烟碧一對雙飛鷺鸕應是遠來無力稍下相
偎沙磧小管誰吹橫笛驚起不知消息悔不當時描
得如今何處尋覓

相見歡

金陵城上西樓倚清秋萬里夕陽垂地大江流 中原
亂簪纓散幾時收試倩悲風吹淚過揚州

柳枝

江南岸柳枝江北岸柳枝折送行人無盡時恨分離柳
枝酒一杯柳枝淚雙垂柳枝君到長安百事違幾時
歸柳枝

康與之

字伯可渡江初以詞受知高宗官郎中有順菴樂府五卷

陳質齋云伯可詞鄙褻之甚

黃叔暘云伯

可以文詞待詔金馬門凡中興粉飾治具及

蕙寧歸養兩宮振集必假伯可之歌詠故應

制之詞為多王性之云伯可樂章令晏叔

原不得獨擅沈伯時云康伯可柳

耆卿音律甚協但未免時有俗語

洞仙歌令

荷花

若耶溪路別岸花無數欲斂嬌紅向人語與綠荷相倚
恨回首西風波淼淼三十六陂烟雨新妝明照水汀
渚生香不嫁東風被誰誤遣踟躕騷客意千里緜緜仙
浪遠何處凌波微步想南浦潮生畫橈歸正月曉風清
斷腸凝竚

應天長

管絃繡陌燈火畫橋塵香舊時歸路腸斷蕭娘舊日風

簾映朱戶鶯能舞花解語念後約頻成輕負緩雕轡獨
自歸來凭欄情緒楚岫在何處香夢悠悠花月更誰
主惆悵後期空有鱗鴻寄紉素枕前淚窓外雨翠幕冷
夜涼虛度未應信此度相思寸腸千縷

喜遷鶯

秋夜
聞鴈

秋寒初勁看雲路鴈來碧天如鏡湘浦烟深衡陽沙遠
風外幾行斜陣回首塞門何處故國關河重省漢使老
認上林欲下徘徊清影江南烟水暝聲過小樓燭暗

金猊冷送目鳴琴裁詩挑錦此恨此情無盡夢想洞庭
飛下散入雲濤千頃過盡也奈杜陵人遠玉關無信

訴衷情令

長安懷古

阿房廢址漢荒丘狐兔又羣遊豪華盡成春夢留下古
今愁君莫上古原頭淚難收夕陽西下塞鴈南來渭
水東流

玉樓春

青牋後約無憑據誤我碧桃花下語誰將消息問劉郎

悵望玉溪溪上路
春來無限傷情緒
擬欲題詩都付
與東風吹落一庭花
手把新愁無寫處

吳億

字大年南渡時人有溪園自怡集

南鄉子

江上雪初消
暖日晴烟弄柳條
認得裙腰芳草綠
魂消
曾折梅花過斷橋
蟬鬢為誰凋
長恨含嬌那處嬌
遙想晚妝呵手罷
無聊更傍朱脣暖
玉簫

曾

覲字純甫汴人紹興中以寄班祇候與龍大淵同為建王內知客孝宗受禪以潛邸舊人除

權知閤門事淳熙初除開府儀同三司加少保醴泉觀使有海野詞一卷

黃叔暘云純甫東都故老詞多感慨如金人捧露盤憶秦娥等曲悽然有秦離之感

金人捧露盤

庚寅春奉使過京師感懷作

記神京繁華地舊游踪正御溝春水溶溶平康巷陌繡鞍金勒躍青驄解衣沽酒醉絃管柳綠花紅到如今
餘霜鬢嗟前事夢魂中但寒烟滿目飛蓬雕欄玉砌空
餘三十六離宮塞笳驚起暮天鴈寂寞東風

憶秦娥

邯鄲道上

風蕭瑟卽郢古道傷行客傷行客繁華一瞬不堪思憶
叢臺歌舞無消息金尊玉管空陳迹空陳迹連天草
樹暮雲凝碧

菩薩蠻

次韻龍
深甫

杏花寒食佳期近一簾烟雨琴書潤砌下水潺潺玉笙
吹暮寒陽臺雲易散往事尋思嬾花底醉相扶當時
人在無

閻蒼舒

蜀人官至侍郎
嘗北使汴京

水龍吟

少年聞說京華上元景色烘晴晝朱輪畫轂雕鞍玉勒
金銜爭驟春滿鰲山夜沉陸海一天星斗正紅毬過了
鳴鞘聲斷回鸞馭鈞天奏誰料此生親到五十年都
城如舊而今但有傷心烟霧縈愁楊柳寶籙宮前絳霄
樓下不堪回首願黃圖早復端門燈火照人還又

左 譽

字與言天台人歷仕後去為
浮屠所著有筠翁長短句

王仲言云與言某名之後籍甚宦途錢塘幕
府樂籍有名姝張芸女名穠色藝妙天下君

願願之如盈盈秋水淡淡春山與一段離愁
堪畫處橫風斜雨把哀柳及帷雲剪水滴粉
搓酥皆為穠作當時都人有晚風殘月柳三
變滴粉搓酥左與言之對後穠委身立勲大
將家易姓章疏封大國紹興中因覓官行闕
暇日訪西湖兩山間忽逢車輿甚盛中觀一
麗人褰簾顧君而顰曰如今若把菱花照猶
恐相逢似夢中視之乃穠也君醒然悟入即
拂衣東渡
一意空門

眼兒媚

樓上黃昏杏花寒斜月小闌干一雙燕子兩行征鴈畫
角聲殘綺窓人在東風裏灑淚對春閒也應似舊盈

盈秋水淡淡春山

陸凝之

字永仲號石室餘杭人
布衣高宗召見不赴

念奴嬌

觀潮

遠山一帶遡晴空極目天涯浮白楓落鴉翻談笑處不
覺雲濤橫席酒病方蘇睡魔猶殢一掃無留迹吳帆越
棹恍然飛上空碧長記草賦梁園凌雲筆勢倒三江
秋色對此驚心空悵望老作紅塵閒客別浦烟平小樓
人散回首千波寂西風掃露為君重噴霜笛

楊无咎

字補之清江人高宗朝累徵不起
自號清將長者有逃禪集二卷

南歌子

次東坡
端午韻

小雨疎疎過長江
滾滾流落霞殘照晚明樓
又是一番重午身寄南州
羅綺紛香陌魚龍漾彩舟
不堪回首鳳池頭
誰道於今霜鬢猶是淹留

生查子

秋來愁更深
黛拂雙蛾淺
翠袖怯天寒
脩竹蕭蕭晚
此意有誰知
恨與孤鴻遠
小立背西風
又是重門掩

甘草子

秋暮永夜西樓冷月明窓戶夢破櫓聲中憶在松江路
敲枕試尋曾遊處記歷歷風光堪數誰與浮家五湖
去儘醉眠秋雨

明月棹孤舟

周三五

寶髻雙垂烟縷縷年紀小未周三五壓衆精神出羣標
格偏向衆中翹楚記得譙門初見處禁不定亂紅飛
去掌托鞋兒肩拖裙子悔不做閒男女

於中好

牆頭艷杏花初試，遶珍叢細按紅藍。欲知占盡春明媚，
悄無意看桃李。持杯準擬花前醉，早一葉兩葉飛墜。
晚來旋旋深無地，更聽得東風起。

阮

閱

一作閨字閨休一作閨休建炎初知
表州致仕寓居宜春著詩話總龜

洞仙歌

贈宜春官
妓趙佛奴

趙家姊妹合在昭陽殿，因甚人間有飛燕。見伊底盡道
獨步江南便江北也。何曾慣見。惜伊情性好，不解嗔。

人長帶桃花笑時臉向尊前酒底見了須歸似恁地能
得幾回細看待不眨眼兒覷着伊將眨眼工夫看伊幾
遍

侯寘

字彥周東武人晁說之甥紹興中以直學士知建康有嬾窟詞一卷

朝中措

元夕上潭帥劉共甫

年來玉帳罷兵籌燈市小遲留花外香隨金勒酒邊人
倚紅樓沙堤此去傳柑侍宴天上風流還記月華小
隊春風十里潭州

風入松

少年心醉杜韋娘，曾格外疎狂。錦箋預約西湖上，共幽
深竹院松莊。愁夜黛眉顰翠，惜歸羅帕分香。重來一
夢繞湖塘。空烟水微茫。同心眼底無蘇小，記舊遊凝竚
淒涼。入扇柳風殘酒，點衣花雨斜陽。

曾

慥

字端伯編
樂府雅詞

調笑

梅

清友羣芳右，萬縞紛披茲獨秀。天寒月薄黃昏後，縞

袂亭亭招手故山千樹連雲岫借問如今安否

曾

惇

字敏父有詞一卷

黃叔暘云敏父故相之孫辭播樂府

點絳脣

重九飲樓霞

九日傳杯要攜佳客樓霞去滿城風雨記得潘郎句

紫菊紅萸何意留儂住愁如許暮烟一縷正在歸時路

朱

雍

紹興中乞召試賢良有梅詞二卷

好事近

梅

春色為誰來枝上半留殘雪恰近小園香徑對霜林寒
月危欄淒斷笛聲長吹到偏鳴咽最好短亭歸路有
行人先折

姚進道

華亭人

青玉案

和賀方回韻送
伯園歸吳中

三年枕上吳中路遣黃耳隨君去若到松江呼小渡莫
驚鷗鷺四橋盡是老子經行處輞川圖上看春暮常
記高人右丞句作箇歸期天已許春衫猶是小蠻鍼線

曾濕西湖雨

劉之翰

荆南人

水調歌頭

獻田都統

涼露洗金井一葉下梧桐謫仙浪游何處華髮作詩翁
烏帽蕭蕭一幅坐對清泉白石矯首撫長松獨鶴歸來
晚聲在碧霄中神仙宅留玉節駐金戎黔南一道十
萬貔虎控雕弓笑折碧荷倒影自唱采蓮新曲詞句滿
秋風劒佩八千歲長入大明宮

田世輔為金州都統制時之翰待峽州達安主

薄閼作此詞獻之田覽之大喜致書約來金城欲厚加
資給而之翰遽亡明年田出閼武恍惚見之翰立道左
因大驚異亟送
千緡與其孤

江緯

向湖邊

退處鄉關幽棲林藪舍宇第須茅蓋翠巘清泉啟軒窓
遙對遇等閒鄰里過從親朋臨顧草草便成歡會策杖
携壺向湖邊柳外旋買溪魚便斫銀絲鱸誰復欲痛
飲如長鯨吞海共惜醺酣恐歡娛難再矧清風明月非

錢買休追念金馬玉堂心膽碎且鬪尊前有阿誰身在

詞綜卷十二

詞綜卷十三

翰林院檢討朱彝尊編

宋詞六十八首

辛棄疾

三十
五首

范成大

五首

黃公度

三首

葛立方

一首

張孝祥

五首

姚寬

三首

程垓

十六
首

辛棄疾

字幼安歷城人耿京聚兵山東節制忠義軍馬留掌書記令奉表南歸高宗召見授承務

郎累官浙東安撫使加龍圖閣待制進樞密
都承旨德祐初以謝枋得請贈少師謚忠敏
有稼軒長短句十二卷

青玉案

元夕

東風夜放花千樹更吹隕星如雨寶馬雕車香滿路鳳
簫聲動玉壺光轉一夜魚龍舞蛾兒雪柳黃金縷笑
語盈盈暗香去衆裏尋他千百度驀然回首那人却在
燈火闌珊處

踏莎行

中秋後二夕帶
湖家尚小酌

夜月樓臺秋香院宇笑吟吟地人來去是誰秋到便淒涼當年宋玉悲如許隨分盃盤等閒歌舞問他有甚堪悲處思量却也有悲時重陽節近多風雨

又

和趙興國
知錄韻

吾道悠悠憂心悄悄最無聊處秋先到西風林外有啼鴉夕陽山下多衰草長憶商山當年四老塵埃也走咸陽道為誰書到便憐然至今此意無人曉

念奴嬌

書東流
村壁

野塘花落又匆匆過了清明時節剗地東風欺客夢一
枕雲屏寒怯曲岸持觴垂楊繫馬此地曾經別樓空人
去舊遊飛燕能說聞道綺陌東頭行人曾見簾底纖
纖月舊恨春江流不盡新恨雲山千疊料得明朝尊前
重見鏡裏花難折也應驚問近來多少華髮

破陣子

為陳同甫賦
壯詩以寄之

醉裏挑燈看劍夢回吹角連營八百里分麾下炙五十
絃翻塞外聲沙場秋點兵馬作的盧飛快弓如霹靂

弦驚了却君王天下事贏得生前身後名可憐白髮生
祝英臺近

寶釵分桃葉渡烟柳暗南浦怕上層樓十日九風雨斷
腸點點飛紅都無人管更誰勸流鶯聲住鬢邊覲試
把花卜歸期才簪又重數羅帳燈昏哽咽夢中語是他
春帶愁來春歸何處却不解帶將愁去

沁園春

帶湖
新居

三徑初成鶴怨猿驚稼軒未來甚雲山自許平生意氣

衣冠人笑抵死塵埃意倦須還身間貴早豈為尊羹鱸
膾哉秋江上看驚弦鴈避駭浪船回東崗更葺茅齋
好都把軒窓臨水開要小舟行釣先應種柳疎籬護竹
莫礙觀梅秋菊堪餐春蘭可佩留待先生手自栽沉吟
久怕君恩未許此意徘徊

滿江紅

家住江南又過了清明寒食花徑裏一番風雨一番狼
籍紅粉暗隨流水去園林漸覺清陰密算年年落盡刺

桐花寒無力 庭院靜空相憶無處說閒愁極怕流鶯
乳燕得知消息尺素如今何處也綠雲依舊無踪跡謾
教人羞去上層樓平蕪碧

又

敲碎離愁紗窗外風搖翠竹人去後吹簫聲斷倚樓人
獨滿眼不堪三月暮舉頭已覺千山綠但試把一紙寄
來書從頭讀相思字空盈幅相思意何時足滴羅襟
點點淚珠盈掬芳草不迷行客路垂楊只礙離人目最

苦是立盡月黃昏闌干曲

又

送李正之
提刑入蜀

蜀道登天一盃送繡衣行客還自歎中年多病不堪離
別東北看騰諸葛表西南更草相如檄把功名收拾付
君侯如椽筆 兒女淚君休滴荆楚路吾能識要新詩
準備廬山山色赤壁磯頭千古浪銅鞮陌上三更月正
梅花萬里雪深時須相憶

又

江行簡楊濟
翁周顯先

過眼溪山怪都是舊時曾識還記得夢中行遍江南江北佳處徑須携杖去能消幾兩平生屐笑塵勞三十九年非長為客吳楚地東南坼英雄事曹劉敵被西風吹盡了無塵跡樓觀甫成人已去旌旗未卷頭先白歎人生哀樂轉相尋今猶昔

水調歌頭

舟次揚州和楊濟翁周顯先韻

落日塞塵起跨馬獵清秋漢家組練十萬列檻篴層樓誰道投鞭飛渡憶昔鏑鳴血污風雨佛狸愁季子正年

少匹馬黑貂裘 今老矣搔白首過揚州倦游欲去江
上手種橘千頭二客東南名勝萬卷詩書事業嘗試與
君謀莫射南山虎直覓富平侯

又

四坐且勿語聽我醉中吟池塘春草未歇高樹變鳴禽
鴻鴈初飛江上蟋蟀還來牀下時序百年心誰要鄉料
理山水有清音 歡多少歌長短酒淺深而今已不如
昔後定不如今閒處直須行樂良夜更教秉燭高會惜

分陰白髮短如許黃菊倩誰簪

又

壬子三山被召陳
端仁給事飲餞

長恨復長恨裁作短歌行何人為我楚舞聽我楚狂聲
余既滋蘭九畹又樹蕙之百畝秋菊更餐英門外滄浪
水可以濯吾纓一盃酒問何似身後名人間萬事毫
髮常重泰山輕悲莫悲生離別樂莫樂新相識兒女古
今情富貴非吾事歸與白鷗盟

又

帶湖吾甚愛千丈翠奩開先生杖履無事一日走千回
凡我同盟鷗鷺今日既盟之後來往莫相猜白鶴恁何
處嘗試與偕來破青萍排翠藻立蒼苔窺魚笑汝癡
計不解舉吾杯廢沼荒丘疇昔明月清風此夜人世幾
歡哀東岸綠陰少楊柳更須栽

賀新郎

別茂嘉
十二弟

綠樹聽鶗鴂更那堪杜鵑聲住鷓鴣聲切啼到春歸無
啼處苦恨芳菲都歇算未抵人間離別馬上琵琶關塞

黑更長門翠輦辭金闕看燕燕送歸妾 將軍百戰身
名裂向河梁回頭萬里故人長絕易水蕭蕭西風冷滿
座衣冠似雪正壯士悲歌未徹啼鳥還知如許恨料不
啼清淚長啼血誰伴我醉明月

又

賦琵琶

鳳尾龍香撥自開元霓裳曲罷幾番風月最苦潯陽江
頭客畫舸亭亭待發記出塞黃雲堆雪馬上離愁三萬
里望昭陽宮殿孤鴻沒絃解語恨難說 遼陽驛使音

塵絕瑣窓寒輕攏慢撚淚珠盈睫推手含情還却手一
抹梁州哀徵千古事雲飛烟滅賀老定場無消息想沉
香亭北繁華歇彈到此為嗚咽

木蘭花慢

滁州送
花倅

老去情味減對別酒怯流年況屈指中秋十分好月不
照人圓無情水都不管共西風只管送歸船秋晚尊鱸
江上夜深兒女燈前征衫便好去朝天玉殿正思賢
想夜半承明留教視草却遣籌邊長安故人問我道愁

腸殢酒只依然目斷秋霄落鴈醉來時響空絃

摸魚兒

淳熙己亥自湖北漕移湖南同官王正之置酒小山亭賦

更能消幾番風雨匆匆春又歸去惜春長怕花開早何
況落紅無數春且住見說道天涯芳草無一作迷歸路怨

春不語算只有殷勤畫簷蛛網盡日惹飛絮長門事

準擬佳期又誤蛾眉曾有人妒千金縱買相如賦脉脉

此情誰訴君莫舞君不見玉環飛燕皆塵土閒愁最苦

休去倚危欄斜陽正在烟柳斷腸處

羅大經云詞意殊恐使在漢唐時寧

不費種豆種桃之禍然聞壽皇見此
詞頗不悅終不加以罪可謂盛德

太常引

建康中秋夜
為呂潛叔賦

一輪秋影轉金波飛鏡又重磨把酒問姮娥被白髮欺
人奈何 乘風好去長安萬里直下看山河所去桂婆
娑人道是清光更多

水龍吟

過南礮
雙溪樓

舉頭西北浮雲倚天萬里須長劒人言此地夜深長見
斗牛光焰我覺山高潭空水冷月明星淡待燃犀下看

凭欄却怕風雷怒魚龍慘
峽束蒼江對起過危樓欲
飛還斂元龍老矣不妨高卧
冰壺涼簟千古興亡百年
悲笑一時登覽問何人又卸
片帆沙岸繫斜陽纜

又
旅次
登樓

楚天千里清秋水隨天去秋無際
遙岑遠目獻愁供恨
玉簪螺髻落日樓頭斷鴻聲裏
江南遊子把吳鉤看了
闌干拍遍無人會登臨意
休說鱸魚堪鱠儘西風季
鷹歸未求田問舍怕應羞見
劉郎才氣可惜流年憂愁

風雨樹猶如此倩何人喚取紅巾翠袖搵英雄淚

鷓鴣天

鵲湖歸
病起作

枕簟溪堂冷欲秋斷雲依水晚來收紅蓮相倚深如怨
白鳥無言定是愁書咄咄且休休一丘一壑也風流
不知筋力衰多少但覺新來嬾上樓

西河

送錢仲耕自江
西移守婺州

西江水道是西江人淚無情却解送行人月明千里從
今日日倚高樓傷心烟樹如薺會君難別君易草草

不知人意十年著破繡衣茸種成桃李問君可是厭承
明東方鼓吹千騎對梅花更消一醉看明年調鼎風
味老病自憐憔悴過吾廬定有幽人相問歲晚淵明歸
來未

永遇樂

京口北固亭懷古

千古江山英雄無覓孫仲謀處舞榭歌臺風流總被雨
打風吹去斜陽草樹尋常巷陌人道寄奴曾住想當年
金戈鐵馬氣吞萬里如虎元嘉草草封狼居胥意氣

得倉皇北顧四十三年望中猶記燈火揚州路可堪回首
佛狸祠下一片神鴉社鼓憑誰問廉頗老矣尚能飯
否

岳倦翁云此作
微覺用事多

漢宮春

立春

春已歸來看美人頭上裊裊春幡無端風雨未肯收盡
餘寒年時燕子料今宵夢到西園渾未辨黃柑薦酒更
傳青韭堆盤却笑東風從此便薰梅染柳更沒些閒
閒時又來鏡裏轉變朱顏清愁不斷問何人會解連環

生怕見花開
花落朝來塞鴈先還

又

會稽秋風
亭觀雨

亭上秋風記去年
嫋嫋曾到吾廬
山河舉目雖異風景
非殊功成者去
覺團扇便與人疎
吹不斷斜陽依舊
茫茫禹跡都無
千古茂林猶在
甚風流章句解擬相如
只今木落江冷
渺渺愁余
故人書報莫因循
忘却尊鱸誰念我
新涼燈火一編太史公書

新荷葉

和趙德
莊韻

人已歸來杜鵑欲勸誰歸綠樹如雲等閒付與鶯飛兔
葵燕麥問劉郎幾度沾衣翠屏幽夢覺來水繞山圍
有酒重携小園隨意芳菲往日繁華而今物是人非春
風半面記當年初識崔徽南雲鴈少錦書無箇因依

南鄉子

登京口
北固亭

何處望神州滿眼風光北固樓千古興亡多少事悠悠
不盡長江滾滾流年少萬兜鍪坐斷東南戰未休天
下英雄誰敵手曹劉生子當如孫仲謀

蝶戀花

元日
立春

誰向椒盤簪綵勝
整整韶華爭上春
風鬢往日不堪重
記省為花常把新春恨
春未來時先借問
晚恨開遲
早又飄零
近今歲花期消息定
只愁風雨無憑準

清平樂

獨宿博山
王氏菴

遶牀饑鼠蝙蝠翻
燈舞屋上松風吹急雨
破紙窓間自語
平生塞北江南歸來
華髮蒼顏布被秋宵
夢覺眼前萬里江山

菩薩蠻

書江西造口壁

鬱孤臺下清江水中間多少行人淚西北是長安可憐

無數山 青山遮不住畢竟東流去江晚正愁余山深

聞鷓鴣

羅大經云南渡初金人追隆祐太后御舟至造口不及而還鷓鴣之句謂恢復之事行不得也

生查子

有覓詞者為賦

去年燕子來繡戶深深處花徑得泥歸都把琴書污
今年燕子來誰聽呢喃語不見捲簾人一陣黃昏雨

浪淘沙

山寺夜作

身世酒杯中萬事皆空古來三五箇英雄雨打風吹何處是漢殿秦宮夢入少年叢歌舞匆匆老僧夜半誤鳴鐘驚起西窗眠不得捲地西風

定風波

暮春漫興

少日春懷似酒濃插花走馬醉千鍾老去逢春如病酒惟有茶甌香篆小薰籠卷盡殘花風未定休恨花開原自要春風試問春歸誰得見飛燕來時相遇夕陽中

范成大

字致能吳郡人紹興中進士累官權吏部尚書參知政事尋帥金陵以病請閒進資政殿

學士領洞霄宮加大學士卒
謚文穆有石湖集詞一卷

眼兒媚

萍鄉道中

酣酣日脚紫烟浮
妍暖破輕裘
困人天氣醉人花
氣午夢扶頭
春慵恰似春塘水
一片縠紋愁
溶溶曳曳東風無力
欲皺還休

菩薩蠻

湘東驛

客行忽到湘東驛
明朝真是瀟湘客
晴碧萬重雲
幾時逢故人
江南如塞北
別後書難得
先自鴈來稀
那堪

春半時

謁金門

宜春道中野塘春水可喜有懷舊隱

塘水碧仍帶麴塵顏色泥泥縠紋無氣力東風如愛惜
恰似越來溪側也有一雙鷓鴣只欠柳絲千百尺繫
船春弄笛

秦樓月

寒食日湖南提舉胡元高家席上聞琴

湘江碧故人同作湘中客湘中客東風回鴈杏花寒食
溫溫月到藍橋側醒心絃裏春無極春無極明朝殘

夢馬嘶南陌

霜天曉角

梅

晚晴風歇一夜春堪折
脉脉花疎天淡雲來去數枝月
勝絕愁更絕此情誰與說
惟有兩行低鴈知人倚闌
干雪

黃公度

字思憲莆陽人紹興八年進士第一官
尚書考功員外郎有知稼翁集詞一卷

好事近

湖上送殘春已負別時歸約
好在故園桃李為誰開誰

落還家應是荔支天浮蟻要人酌莫把舞裙歌扇便
等閒拋却

卜算子

別士季
弟之官

薄宦各東西往事隨風雨先自離歌不忍聞又何況春
將暮愁共落花多人逐征鴻去君向瀟湘我向秦後
會知何處

青玉案

鄰雞不管離懷苦又還是催人去回首高城音信阻霜

橋月館水村烟市總是思君處
裛殘別袖燕支雨謾

留得愁千縷欲倩歸鴻分付與鴻飛不住倚欄無語獨

立長天暮

按本集公登第後為趙忠簡所器而秦檜頗銜之及召赴行在雖知非當路意而迫於君

命故寓意此詞
益去就早定矣

葛立方

字常之丹陽人勝仲子紹興八年進士官至吏部侍郎有歸愚集詞一卷

卜算子

裊裊水芝紅脉脉薰葭浦浙浙西風澹澹烟幾點疎疎
雨草草展杯觴對此盈盈女葉葉紅衣當酒船細細

流霞舉

張孝祥

字安國烏江人紹興二十四年廷試第一累遷中書舍人直學士院兼都督府參贊軍事

領建康留守尋以荆南湖北路安撫使請

祠進顯謨閣直學士有于湖集詞一卷

黃叔暘云于湖有紫薇雅詞湯衡為序稱其平昔未嘗著墨筆酣興健頃刻即成却無一

字無

來處

滿江紅

聽雨

斗帳高眠寒窓靜瀟瀟雨意南樓近更移三鼓漏傳一
水點點不離楊柳外聲聲只在芭蕉裏也不管滴破故

鄉心愁人耳 無似有遊絲細聚復散真珠碎天應分
付與別離滋味破我一牀蝴蝶夢輸他雙枕鴛鴦睡向
此際別有好思量人千里

念奴嬌

星沙初下望重湖遠水長雲漠漠一葉扁舟誰念我今
日天涯飄泊平楚南來大江東去處處風波惡吳中何
地滿懷俱是離索長記送我行時綠波亭上泣透青
羅薄檣燕低飛人去後依舊湘城簾幕不盡山川無窮

烟浪辜負秦樓約
漁歌聲斷為君雙淚傾落

鷓鴣天

日日青樓醉夢中
不知樓外已春濃
杏花未濕疎疎雨
楊柳初搖短短風
扶畫鷁
躍花驄
湧金門外小橋東
行行又入笙歌裏
人在珠簾第幾重

西江月

洞庭

問訊湖邊春色重
來又是三年東風吹我過湖船
楊柳絲絲拂面
世路如今已慣
此心到處悠然
寒光亭下

水連天飛起沙鷗一片

六州歌頭

長淮望斷，塞莽然平。征塵暗，霜風勁，悄邊聲。黯銷凝。
追想當年事，殆天數，非人力。洙泗上，絃歌地，亦殫隔。
水村鄉，落日牛羊下，區脫縱橫。看名王宵獵，騎火一川。
明笳鼓悲鳴，遣人驚。念腰間，箭匣中，斂空埃。蠹竟何
成時，易失心，徒壯歲。將零渺，神京干羽方懷遠，靜烽燧。
且休兵。冠蓋使，紛馳騖，若為情。聞道中原遺老，常南望。

翠葆霓旌使行人到此忠憤氣填膺有淚如傾

朝野遺記云安

國在建康留守席上賦此歌闋魏公為罷席而入

姚寬

字令威剡川人為六部監門有西溪居士樂府一卷

憶王孫

毵毵楊柳綠初低
澹澹梨花開未齊
樓上情人聽馬嘶
憶郎歸
細雨春風濕酒旗

生查子

郎如陌上塵
妾似隄邊絮
相見兩悠悠
揚踪跡無尋處

酒面撲春風淚眼零秋雨過了別離時還解相思否

踏莎行

蘋葉烟深荷花露濕碧蘆紅蓼秋風急采菱渡口日將
沉飛鴻樓上人空立彩鳳難雙紅綃暗泣回紋未剪
吳刀澀夢魂歸處不留踪厭厭一夜涼蟾入

程

垓

字正伯眉山人有
書舟雅詞一卷

按正伯與子瞻為中表
兄弟故其詞有相亂者

酷相思

月挂霜林寒欲墜正門外催人起柰離別如今真箇是
欲住也留無計欲去也來無計馬上離魂衣上淚各
自箇供憔悴問江路梅花開也未春到也須頻寄人到
也須頻寄

小桃紅

不恨殘花驪不恨殘春破只恨流光一年一度又催新
火縱青天白日繫長繩也留春得麼花院從教鎖春
事從教過燒筍園林嘗梅臺榭有何不可已安排珍簾

小胡牀待日長閒坐

芭蕉雨

雨過涼生藕葉晚庭消盡暑
渾無熱枕簟不勝香滑爭
柰寶帳情生金尊意愜
玉人何處夢蛺思一見冰雪
須寫箇帖兒叮嚀說道
肯來麼今夜小院無人重
樓有月

摸魚兒

掩淒涼黃昏庭院角聲何處鳴咽
矮窓曲屋風燈冷還

是苦寒時節凝竚切念翠被薰籠夜夜成虛設倚窓愁
絕聽鳳竹聲中犀幃影外簌簌釀寒雪傷心處却憶
當年輕別梅花滿院初發吹香弄藥無人見惟有暮雲
千疊情未徹又誰料而今好夢分胡越不堪重說但記
得當初重門鎖處猶有夜深月

念奴嬌

秋風秋雨正黃昏供斷一窓愁絕帶減衣寬誰念我難
忍重城離別轉枕褰帷挑燈整被總是相思切知他別

後負人多少風月 不是怨極愁濃只愁重見了相思
難說料得新來魂夢裏不管飛來蝴蝶排悶人間寄愁
天上終有歸時節如今無奈亂雲依舊千疊

南浦

金鴨嬾薰香向晚來春醒一枕無緒濃綠漲瑤窓東風
外吹盡亂紅飛絮無言竚立斷腸惟有流鶯語碧雲欲
暮空惆悵韶華一時虛度 追思舊日心情記題葉西
樓吹花南浦老去覺歡疎傷春恨多付斷雲殘雨黃昏

院落問誰猶在凭欄處
可堪杜宇但只解聲聲催他春去

滿庭芳

臨安
晚登

南月驚烏西風破鴈又是秋滿平湖採蓮人靜寒色戰
菰蒲舊信江南好景一萬里輕覓尊鱸誰知道吳儂未
識蜀客已情孤
憑高增悵望湘雲盡處都是平蕪問
故鄉何日重見吾廬縱有荷紉芰製終不似菊短籬疎
歸情遠三更雨夢依舊繞庭梧

漁家傲

彭門道中

獨木小舟烟雨濕燕兒亂點春江碧江上青山隨意覓
人寂寂落花芳草催寒食昨夜青樓今日客吹愁不
得東風力細拾殘紅書怨泣流水急不知那個傳消息

南鄉子

幾日訴離尊歌盡陽關不忍分此度天涯真個去消魂
相送黃花落葉村斜日又黃昏蕭寺無人半掩門今
夜粉香明日淚休論只要羅巾記舊痕

憶秦娥

青門深海棠開盡春陰陰春陰陰萬重雲水一寸歸心
玉樓深鎖烟消沉知他何日同登臨同登臨待收紅
淚細說如今

謁金門

春夜雨催潤柳塘花塢小院重門深幾許畫簾香一縷
獨立晚庭凝竚細把花枝閒數燕子不來天欲暮說
愁無處所

卜算子

獨自上層樓樓外青山遠望到斜陽欲盡時不見西飛
燕
獨自下層樓樓下蛩聲怨待到黃昏月上時依舊
柔腸斷

菩薩蠻

畫橋拍拍春江綠行人正在春江曲花潤接平川有人
花底眠
東風原自好只怕催花老安得萬垂楊繫教
春日長

愁倚欄令

春猶淺柳初芽杏初花楊柳杏花交映處有人家
玉
窗明煖烘霞小屏上水遠山斜昨夜酒多春睡重莫驚
他

水龍吟

夜來風雨匆匆故園定是花無幾愁多怨極等閒孤負
一年芳意柳困桃慵杏青梅小對人容易算好春長在
好花長見元只是人憔悴
回首池南舊事恨星星不

堪重記如今但有看花老眼傷時清淚不怕逢花瘦只
愁怕老來風味待繁紅亂處留雲借月也須揀醉

洞庭春色

錦字親裁淚巾偷裛細說舊時記笑桃門巷妝窺寶靨
弄花庭榭香濕羅衣幾度相隨游冶去任月細風尖猶
未歸多少事有垂楊眼見紅燭心知如今事都過也
但贏得雙鬢成絲歎半妝紅豆相思有分兩分青鏡重
合難期惆悵一春飛絮夢恁悠颺教人分付誰銷魂處

又梨花雨暗半掩重扉



詞綜卷十三

欽定四庫全書

總校官庶吉士臣張能照
校對官中書臣潘庭筠

謄錄監生臣馮曰琮

欽定四庫全書薈要

集部

詞綜卷十四

五

詳校官編修臣繆晉



詞綜卷十四

翰林院檢討朱彝尊編

宋詞六十八首

韓元吉

五首

周必大

一首

京鏗

一首

尤袤

一首

仲并

二首

朱熹

一首

真德秀

一首

趙汝愚

一首

洪适

四首

吳儆

四首



楊萬里 一首

李處全 二首

張震 二首

羅願 一首

崔與之 一首

劉克莊 八首

樓鏐 一首

吳琚 一首

趙彥端 七首

管鑑 一首

魏子敬 一首

甄龍友 一首

俞國寶 一首

衛元卿 一首

李石 二首

張鑑 三首

杜 旗 三首

劉 儼 四首

岳 珂 一首

程 珌 一首

王千秋 一首

程 先 一首

蘇 洵 一首

劉圻父 一首

韓元吉

字元谷號南澗許昌人官
吏部尚書有焦尾集一卷

六州歌頭

東風著意先上小桃枝紅粉膩嬌如醉倚朱扉記年時
隱映新妝面臨水岸春將半雲日煖斜陽轉夾城西草

軟沙平驟馬垂楊渡玉勒爭嘶認娥眉凝笑臉薄拂胭
脂繡戶曾窺恨依依 昔携手處香如霧紅隨步怨春
遲消瘦損憑誰問只花知淚空垂舊日堂前燕和烟雨
又雙飛人自老春長好夢佳期前度劉郎幾許風流地
也應悲但茫茫暮靄目斷武陵溪往事難追

薄倖

送君南浦對烟柳青青萬縷更滿眼殘紅吹盡葉底黃
鸝自語甚動人多少離情樓頭水濶山無數記竹裏題

詩花邊載酒魂斷江干春暮 都莫問功名事白髮星
星如許任鷄鳴起舞鄉關何在憑高目盡孤鴻去漫留
君住趁醪醕香煖持杯且醉瑤臺路相思記取愁絕西
窓夜雨

謁金門

春雪

春尚淺誰把玉英裁剪儘道梅梢開未遍卷簾花滿院
樓上酒融歌煖樓下水平烟遠却似湧金門外見絮
飛波影亂

霜天曉角

題采石蛾眉亭

倚天絕壁直下江千尺天際兩蛾橫黛愁與恨幾時極
暮潮風正急酒闌聞塞笛試問謫仙何處青山外遠
烟碧

水龍吟

題三峯閣詠
英華女子

雨餘疊嶂浮空望中秀色仙都是洞天未鎖人間春好
玉妃曾墜錦瑟繁絃鳳笙清響九霄歌吹問分香舊事
劉郎去後知誰伴風前醉回首暝烟千里但紛紛落

紅如淚多情易老青鸞何許詩成誰寄斗轉參橫半簾
花影一溪寒水悵飛鳬路杳行雲夢斷有三峯翠

周必大

字子充一字宏道廬陵人紹興二十一年進士歷官左丞相封益國公贈太師謚文忠有

省齋集近體
樂府一卷

點絳脣

贈歌者
小瓊

秋夜乘槎客星容到天孫渚眼波微注將謂牽牛渡
見了還非重理霓裳舞雖無誤幾年一遇莫訝周郎顧

京

鏜

字仲遠豫章人登紹興二十七年進士第由縣令擢御史遷右司郎官出為四川安撫使

進刑部尚書慶元初官左丞相卒贈太保初謚文穆以家諱從其子請謚文忠改謚莊定

有松坡居士

樂府一卷

雨中花

重陽

玉局祠前銅壺閣畔錦城藥市爭奇正紫萸綴席黃菊
浮卮巷陌連鑣並轡樓臺吹竹彈絲登高望遠一年好
景九日佳期 自憐行客猶對佳賓留連豈是貪癡誰
會得心馳北闕興寄東籬惜別未催鷓首追歡且醉蛾
眉明年此會他鄉今日總是相思

尤 袤

字延之無錫人紹興中進士累官禮部尚書正奉大夫贈光祿大夫謚文簡有梁溪集

瑞鷓鴣

詠落梅

清溪西畔小橋東落月紛紛水映空
五夜客愁花片裏
一年春事角聲中
歌殘玉樹人何在舞破山香曲未
終却憶孤山醉歸路馬蹄香雪襯東風

仲 并

字彌性江都人紹興中進士授平江教授改左承奉郎歷光祿寺丞終朝請大夫淮東安

撫司參議有浮山集

水調歌頭

浮遠堂

靜練平千頃，華棟俯中流。
凌晨畫戟來看宿，雨斷虹收。
八九胸中雲夢，三千筆端風月，
無處快凝眸。笑詠一堂上，
揮麈氣橫秋。
俯危欄，紅日下，暮雲收。
無窮偉觀，祇應天意為君謀。
容我時醒時醉，獨泛微烟微雨，
浩蕩逐輕鷗。不羨岳陽勝，丹碧聳層樓。

念奴嬌

同前

練江風靜，卧冰奩百尺，朱欄飛入。
江遠浮天天在水，水滿半天雲濕。
白鳥明邊，青山斷處，眼冷江頭立。
月明朝

上葦間漁唱聲急 幾度吹老蘋花野香無數欲寄應
難及天借詩人供醉眼尊俎一時收拾竹裏行厨花間
步障風雨生呼吸酒闌歌罷釣船先具簑笠

朱 熹

字元晦一字仲晦婺源人第進士仕至轉運
副使崇政殿說書煥章閣待制致仕贈太師
封信國公改徽國謚
文有文公集詞一卷

水調歌頭

藥括杜牧之
九日齊州詩

江水浸雲影鴻鴈欲南飛携壺結客何處空翠渺烟霏
塵世難逢一笑況有紫萸黃菊堪插滿頭歸風景今朝

是身世昔人非
酬佳節須酩酊莫相違
人生如寄何事辛苦怨斜暉
無盡今來古往多少春花秋月那更有
危機與問牛山客何必淚沾衣

真德秀

字景元更字景希浦城人第慶元進士歷官翰林學士知制誥贈銀青光祿大夫謚文忠學

者稱西山先生

蝶戀花

紅梅

兩岸月橋花半吐紅透肌香暗把遊人誤
盡道武陵溪上路不知迷入江南去
先自冰霜真態度何事枝頭

點點胭脂污莫是東君嫌淡素問花花又嬌無語

趙汝愚

字子直漢王元佐七世孫家餘干舉進士第一累官光祿大夫右丞相贈太師追封沂國

公謚

忠定

柳梢青

題豐樂樓

水月光中烟霞影裏湧出樓臺空外笙簫人間笑語身
在蓬萊 天香暗逐風回正十里荷花盡開買箇輕舟
山南遊遍山北歸來

洪适

字景伯皓子中博學宏詞科累官尚書右僕射同中書門下平章事兼樞密使謚文惠有

好事近

別傳文

柳岸碧漪深底事催人行色無計相留情話只別愁如
織小蠻樊素兩傾城幾度醉狂客明日扁舟西去聽
歌聲不得

生查子

桃疎蜨惜香柳困鶯銜絮日影過簾旌多少閒愁緒
紅綻武陵溪綠暗章臺路春色似行人無意花間住

浣溪沙

餞范子
芬行

整頓春衫欲跨鞍
一杯相屬少開顏
愁蛾不似舊時彎
未見兩星添柳宿
忍教三疊唱陽關
相思空望會稽

山

虞美人

芭蕉滴滴窓前雨
望斷江南路
亂雲重疊幾多山
不似倦飛鷗鳥便知還
角聲更聽譙門弄
夜夜思歸夢
都江樓下水含漪
孤負釣灘烟艇綠簑衣

吳儼

字益恭休寧人紹興二十七年進士淳熙初通判邑州已除知州兼廣南西路安撫都監

以親老丐祠主管台州崇道館轉朝散郎致仕寶祐中追謚文肅有竹洲集詞一卷

滿庭芳

寄葉蔚宗

草滿池塘鶯啼楊柳燕忙知為泥融飄花流水竹外小
橋通又是一春憔悴摘殘英遍遶芳叢長安遠平蕪盡
處疊疊但雲峯 西湖行樂處牙檣漾鷁錦帳翻虹想
年時桃李應已成空欲寫相思寄與雲天濶難覓征鴻
空凝想時時殘夢依約上陽鐘

浣溪沙

題星
州寺

十里青山汭碧流，夕陽沙晚片帆收。
重重烟樹出層樓。
人去人歸芳草渡，鷗飛鷗沒白蘋洲。
碧桐翠竹記曾遊。

遊

又

題餘干
傳舍

畫楯朱欄繞碧山，平湖徙倚水雲寬。
人家楊柳帶汀灣。
目力已隨飛鳥盡，機心還逐白鷗閒。
蕭蕭微雨晚來寒。

寒

減字木蘭花

中秋獨與
靜之飲

碧梧秋老滿地琅玕紛不掃門掩黃昏惟有年時月照
人淒涼滿眼肯作六年燈火伴莫說淒涼來歲如今
又一方

楊萬里

字廷秀吉水人紹興中進士歷祕書監以寶
文閣待制致仕進寶謨閣學士贈光祿大夫

謚文節有誠齋

集樂府一卷

好事近

月未到誠齋先到萬花川谷不是誠齋無月隔一庭脩

竹 如今纔是十三夜月色已如玉未是秋光奇絕看
十五十六

李處全

字粹伯淳熙中侍御
史有晦菴詞一卷

水調歌頭

送王景文

上馬趣携酒送客古朱方秋風斜日山際低草見牛羊
醅酹不知更漏但見橫江白露清映月如霜平睨廣寒
殿誰說路岐長 醉還醒時起舞念吾鄉江山爾爾回
首千載幾興亡一笑書生事業誰笑管城居士不換碧

油幢好在中冷水擊節奏伊涼

菩薩蠻

杜鵑只管催歸去知渠教我歸何處故國淚生痕那堪
枕上聞嚴裝吾已具泛宅吳中路弭楫喚東鄰江東
日暮雲

張震

字東父號無隱居士益寧人孝宗朝為諫官

黃叔暘云無隱居士詞甚婉媚益富貴人語也

驀山溪

青梅如豆斷送春歸去小綠間長紅看幾處雲歌柳舞
偎花識面對月共論心携素手采香遊踏遍西池路
水邊朱戶曾記銷魂處小立背秋千空悵望娉婷韻度
楊花撲面香糝一簾風情脉脉酒厭厭回首斜陽暮

蝶戀花

梅子初青春已暮芳草連雲綠遍西池路小院繡簾纔
半舉銜泥紫燕雙飛去人在赤欄橋畔住不解傷心
還解相思否清夢欲尋猶間阻紗窓一夜蕭蕭雨

羅願

字端良號存齋歙縣人紹興中以蔭補承務郎監臨安新城稅歷鄂州守有鄂州小集

水調歌頭

中秋和施司諫

秋宇淨如水月鏡不安臺鬱孤高處張樂語笑脫塵埃
簷外白毫千丈坐上銀河萬斛心境兩佳哉俯仰共清
絕底處著風雷問天公邀月姊媿凡才婆娑人世羞
見蓬鬢漾金壘來歲公歸何處照耀彩衣簪橐禁直且
休催一曲庾江上千古繼韶陔

崔興之

字正子廣州人紹熙四年進士累官廣東經畧安撫使兼知廣州拜參知政事右丞相皆

力辭以觀文殿大學士致仕
封南海郡公卒謚清獻有集

水調歌頭

萬里雲間戍立馬
劒門闕亂山極目無際直北是長安
人苦百年塗炭鬼哭三邊鋒鏑天道久應還
手寫留屯奏炯炯寸心丹
對青燈搔白髮漏聲殘老來勲業未就妨却一身閒
梅嶺綠陰青子蒲澗清泉白石怪我舊盟寒
烽火平安夜歸夢到家山

劉克莊

字潛夫莆田人以蔭仕淳熙中賜同進士出身官龍圖閣直學士有俊村別調一卷

憶秦娥

遊人絕綠陰滿野芳菲歇芳菲歇養蠶天氣采茶時節
枝頭杜宇啼成血陌頭楊柳吹成雪吹成雪淡烟疎
雨江南三月

玉樓春

呈然
節推

年年躍馬長安市客裏似家家似寄青錢換酒日無何
紅燭呼盧宵不寐易挑錦婦機中字難得玉人心下
事男兒西北有神州莫灑水西橋畔淚

賀新郎

端午

思遠樓前路望平隄十里湖光畫船無數綠葢盈盈紅
粉面葉底荷花解語鬪巧結同心雙縷尚有經年離別
恨一絲絲總是相思處相見也又重午清江舊事傳
荆楚歎人情千載如新尚沉菰黍且盡尊前今日醉誰
肯獨醒弔古沉幾盞菖蒲綠醕兩兩龍舟爭競渡奈珠
簾暮捲西山雨看未足怎歸去

又

遊周氏
花園

溪上收殘雨倚危欄薄綿乍脫日陰亭午鬧市不知春
色處散在荒園廢墅漸小白長紅無數客子雖非河陽
令也隨緣暫作鶯花主那可負甕中醕 碧雲四合千
巖暮恨匆匆余方有事子姑歸去趁取羣芳未搖落暇
日捉魚就煮歎激電光陰如許回首明年何處在問桃
花尚記劉郎否公莫笑醉中語

滿江紅

落日登樓誰管領倦遊狂客待喚起滄浪漁父隔江吹

笛看水看山身尚健憂晴憂雨頭先白對暮雲不見美人來遙天碧
山中鶴應相憶沙上鷺渾相識想石田茆屋草深三尺空有鬢如潘騎省斷無面見陶彭澤便
倒傾海水浣衣塵難前滌

清平樂

贈維揚陳師文
參議家舞姬

宮腰束素只怕能輕舉好築避風臺護取莫遣驚鴻飛去
一團香玉溫柔笑顰俱有風流貪與蕭郎眉語不知舞錯伊州

摸魚兒

怪新來倚樓看鏡清狂渾不如舊暮雲千里傷心處

一作

色那更亂蟬疎柳凝望久愴故國百年陵闕誰回首功

名大謬歎采藥名山讀書精舍此計幾時就封侯事

久矣輸人妙手滄洲

一作扁舟

聊作漁叟高冠長劍都閒物

世上切身惟酒千載後君試看拔山扛鼎俱烏有英雄
骨朽問顧曲周郎而今還解來聽小詞否

長相思

朝有時暮有時潮水猶知日兩回人生長別離
來有時去有時燕子猶知社後歸君行無定期

樓

鍰

字巨山淳熙中知江陰軍

浣溪沙

雙檣堂

夏半陽烏景最長小池不斷藕花香電影雷聲催急雨
十分涼
芡剝明珠隨意嚼瓜分瓊玉趁時嘗雙檣堂
深新釀好且傳觴

吳

琚

字居夫汴人憲聖皇后姪太寧郡王益之子歷尚書郎部使者直學士慶元中以鎮安節

度使守建康遷少保
卒謚忠惠有雲壑集

酹江月

觀潮
應制

玉虹遙挂望青山隱隱有如一抹忽覺天風吹海立好
似春霆初發白馬凌空瓊鰲駕水日夜朝天闕飛龍舞
鳳鬱葱環拱吳越此景天下應無東南形勝偉觀真
奇絕好是吳兒飛彩幟蹴起一江秋雪黃屋天臨水犀
雲擁看擊中流楫晚來波靜海門飛上明月

趙彥端

字德莊乾道淳熙間以直寶文閣知建寧府有介菴詞四卷

千秋歲

杏花風下獨立春寒夜微雨度疎星挂輝輝濃艷出嫋
嫋繁枝亞朱檻倚輕羅醉裏添還却寂寞情猶乍悵
望驂鸞駕衣褪玉香欺麝一花揀一醉杯重憑誰把春
去也重簾翠幕人如畫

謁金門

休相憶明夜遠如今日樓外綠烟村幕幕花飛如許急
柳外晚來船集波底夕陽紅濕送盡去雲成獨立酒

醒愁又入

張正夫云德莊宗室之秀賦西湖謁金門云波底夕陽紅溼阜陵間誰詞答云彥端所作

上云我家裏人也
會作此等語喜甚

青玉案

贈勉道
琵琶人

當年萬里龍沙路載多少離愁去冷壓層簾雲不度芙
蓉雙帶垂楊嬌髻弦索初調處花凝玉立東風暮曾
記江邊麗人句異縣相逢能幾許多情誰料琵琶洲畔
同醉清明雨

沙塞子

春水綠波南浦漸理棹行人欲去黯銷魂柳際輕烟花
梢微雨長亭放箴無計住但芳草迷人去路忍回頭
斷雲殘日長安何處

清平樂

席上
贈人

桃根桃葉一樹芳相接春到江南三二月迷損東家蝴蝶
殷勤踏取青陽風前花正低昂與我同心梔子報
君百結丁香

點絳脣

途中逢
管倅

顚顚天涯故人相遇情如故別離何遽忍唱陽關句
我是行人更送行人去愁無據寒蟬鳴處回首斜陽暮

虞美人

斷蟬高柳斜陽處池閣絲絲雨綠檀珍簾卷新紅屈曲
杏花蝴蝶小屏風春山疊疊秋波漫收拾殘鍼線又
成嬌困倚檀郎無事更拋蓮子打鴛鴦

豆葉黃

粉牆丹檻柳絲中簾箔輕明花影重午醉醒來一面風

綠蔥蔥幾顆櫻桃葉底紅

管

鑑

字明仲有養拙堂詞一卷

生查子

天教百媚生
賦得多情怨
背整玉搔頭
寬了黃金釧
情隨歌意深
故故回嬌盼
不是不相知
只為難相見
魏子敬

生查子

愁盈鏡裏山
心疊琴中恨
露濕玉蘭秋
香伴金屏冷

雲歸月正圓鴈到人無信孤損鳳凰釵立盡梧桐影

劉與

伯云此詞題

道途壁甚工

甄龍友

字雲卿永嘉人紹興中進士官國子監簿

霜天曉角

題赤壁

峨眉仙客四海文章伯來向東坡遊戲人間世著不得

去國誰愛惜在天何處覓但見尊前人唱前赤壁後

赤壁

俞國寶

俞一作于臨川人淳熙間太學生有醒菴遺珠集

風入松

題酒肆

一春長費買花錢，日日醉湖邊。
玉驄慣識西湖路，驕嘶過沽酒樓前。
紅杏香中，歌舞綠楊影裏，秋千暖風十里。
麗人天花壓鬢，雲偏畫船，載得春歸去。
餘情付湖水，湖烟明日重扶殘醉來尋陌上花鈿。

衛元卿

洋州人，領薦，不得志游山谷間。

謁金門

花過雨，又是一番紅素。
燕子歸來愁不語，故巢無覓處。

誰在玉樓歌舞誰在玉關辛苦若使邊塵吹得去東風
侯萬戶

李石

字知幾資陽人乾道中以薦任太學博士出為成都倅有方舟集

臨江仙

烟柳疎疎人悄悄畫樓風外吹笙倚欄聞喚小紅聲薰
香臨欲睡玉漏已三更坐待不來來又去一方明月
中庭粉牆東畔小橋橫起來花影下扇子撲流螢

漁家傲

贈鼎湖官妓

西去征鴻東去水幾重別恨千山裏夢繞綠窓書半紙
何處是桃花溪畔人千里瘦玉倚香愁黛翠勸人須
要人先醉問道明朝行也未猶自記燈前背立偷垂淚

張

鎡

字功甫號約齋西秦人官奉議郎有玉照堂詞一卷

鵲橋仙

菱

連汀接渚縈蒲帶藻萬鏡香浮光滿濕烟吹霽木蘭輕
照波底紅嬌翠婉玉纖采來銀籠携去一曲山長水
遠綵鴛雙慣貼人飛恨南浦離多夢短

蘭陵王

荷花

夢汀側朝靄依依弄色知何許
湘女淡妝羽節飛來帶
秋碧輕裙素綃織誰與明璫競飾
無言處相倚遡迴應
有柔情正堆積
當年駐香鷁記草媚羅裙波映文席

闕

斜陽返照暮

雨濕愛天際涼入
愁寂念疇昔謾太華峰頭幽夢尋
覓而今兩鬢如花白
但一線才思半星心力
新詞奇句
便做有怎道得

滿庭芳

促織

月洗高梧露溥幽草寶釵樓外秋深土花沿翠螢火墜
牆陰靜聽寒聲斷續微韻轉淒咽悲沉爭求侶殷勤勸
織促破曉機心兒時曾記得呼燈灌穴斂步隨音任
滿身花影猶自追尋携向畫堂試鬪亭臺小籠巧裝金
今休說從渠牀下涼夜聽孤吟

杜旗

字伯高號橋齋金華人呂成公
門下士與弟四人並有名譽

陳同甫云伯高奔風逸足而鳴以和鸞仲高
麗句晏叔原不得擅美叔高戈矛森立有吞

虎食牛之氣左右輝映匪獨一門之盛可謂一時之豪葉正則贈幼高云杜子五兄弟

詞林俱上頭

酹江月

石頭城

江山如此是天開萬古東南王氣一自髯孫橫短策坐使英雄鵲起玉樹聲銷金蓮影散多少傷心事千年遼鶴併疑城郭非是當日萬駟雲屯潮生潮落處石頭孤峙人笑褚淵今齒冷只有袁公不死斜日荒烟神州何在欲墮新亭淚元龍老矣世間何限餘子

摸魚兒

湖上

放扁舟萬山環處平鋪碧浪千頃仙人憐我征塵久借
與夢遊清枕風乍靜望兩岸羣峰倒浸玻璃影樓臺相
映更日薄烟輕荷花似醉飛鳥墮寒鏡中都內羅綺
千街萬井天教此地幽勝仇池仙伯今何在隄柳幾眠
還醒君試問此意只今更有何人領功名未竟待學取
鷗夷仍携西子來動五湖興

驀山溪

春風如客可是繁華主紅紫未全開早綠遍江南千樹
一番新火多少倦遊人纖腰柳不知愁猶作風前舞
小闌干外兩兩幽禽語問我不歸家有佳人天寒日暮
老來心事惟有春知江頭路帶春來更帶春歸去

劉 擬

一云名仙掄字叔儼
廬陵人有招山集

黃叔暘云叔儼有招山詩
集樂章尤為人所膾炙

菩薩蠻

海棠

東風去了秦樓畔一川烟草無人管芳樹雨初晴黃鸝

三兩聲 海棠花已謝春事無多也只有牡丹時知他
歸不歸

念奴嬌

送張明之
赴京西幕

餘艤東下望西江千里蒼茫烟水試問襄州何處是雉
堞連雲天際叔子殘碑卧龍陳迹遺恨斜陽裏後來人
物如君瓌偉能幾其肯為我來耶河陽下士正是强
人意勿謂時平無事也便以言兵為諱眼底山河樓頭
鼓角都是英雄淚功名機會要須閒暇先備

又長沙趙帥
席上作

西風何事為行人掃蕩煩襟如洗熏漲蒸瀾都捲盡一
片瀟湘清泚酒病驚秋詩愁入鬢對影人千里楚宮故
事一時分付流水江上買取扁舟排雲湧浪直過金
沙尾歸去江南丘壑處不用重尋月姊風露杯深芙蓉
裳冷笑傲烟霞裏草廬如舊卧龍知為誰起

訴衷情

征衣薄薄不禁風長日雨絲中又是一年春事花信到

梧桐 雲漠漠水溶溶去匆匆客懷今夜家在江西身
在江東

岳

珂

字肅之號倦翁飛孫管内勸農使知嘉興府
歷戶部侍郎淮東總領兼制置使有玉楮集

祝英臺近

北固亭

淡烟橫層霧斂勝槩分雄占月下鳴榔風急怒濤颭關
河無限清愁不堪臨鑑正雙鬢秋風塵染 謾登覽極
目萬里沙場事業頻看劒古往今來南北限天塹倚樓
休弄新聲重城門掩歷歷數西州更點

程

珌

字懷古休寧人紹熙四年進士累官寶文閣學士知福州兼福建安撫使封新安郡侯以

端明殿學士致仕卒贈特進少師有沼水集詞一卷

念奴嬌

憶先廬春山之勝

歸來一笑尚看看
趣得人間寒食阿壽牽衣仍問我雙鬢
新來添白忍見庭前去年芳草依舊青青色
西湖雨後綠波兩岸平拍天教斷送流年三之一矣
又是成疎隔燕子春寒渾未到誰說江南消息
玉樹熏香水桃翻浪好箇真消息
這回歸去松風深處橫笛

王千秋

字錫老東平人
有審齋詞一卷

賀新郎

石城
弔古

弔古城頭去正高秋霜晴木落路通洲渚欲問紫髯分
鼎事只有荒祠烟樹巫覡去久無簫鼓霸業荒涼遺堞
墜但蒼崖日閱征帆渡興與廢幾今古夕陽細草空
凝竚試追思當時子敬用心良誤要約劉郎銅雀醉底
事遽爭荆楚遂但見蜀吳烽舉致使五官伸脚睡喚諸
兒畫取長陵土遺此恨欲誰語

程

先

字傳之休寧人父官團練以偏師禦金人於池州殉節死當錄其嗣因讓不受隱居東山

遣其子永奇師事晦菴即

語錄所稱程次卿是也

鎖窓寒

有感

雨洗紅塵雲迷翠麓小車難去淒涼感慨未有今年春
暮想曲江水邊麗人影沉香歇誰為主但免葵燕麥風
前搖蕩徑花成土空被多情苦嘉會難逢少年幾許
紛紛沸鼎負了青陽百五待何時重覩太平典衣貰酒
相爾汝算蘭亭有此歡娛又却悲今古

蘇

洞

字名叟山陰人有冷然閣集

雨中花

懷劉改之

十載尊前放歌起舞人間酒戶詩流盡期君凌厲羽翮
高秋世事幾如人意儒冠還負身謀歎天生李廣才氣
無雙不得封侯榆關萬里一去飄然片雲甚處神州
應悵望家人父子重見無由隴水寂寥傳恨淮山宛轉
供愁這回休也燕鴻南北長隔英游

劉圻父

字子寰號篁嶠游朱文公之門有麻沙集

花發沁園春

呈史澹洲

卷十四

換譜伊涼選歌燕趙一番樂事重起花新笑靨柳軟纖
腰齊楚衆芳園裏年年佳會長是傍清明天氣正魏紫
衣染天香蜀紅妝破春睡一簇猩羅鳳翠遍東園西
城點檢芳事銓齋吏散畫館人稀幾闌管絃清脫人生
適意流轉共風光遊戲到過景取次成歡怎教良夜休
醉

詞綜卷十四

詞綜卷十五

翰林院檢討朱彝尊編

宋詞六十六首

姜夔

二十首

陸游

十五首

陳亮

三首

劉過

九首

楊炎

六首

張輯

十一首

姜夔

字堯章都陽人流寓吳興有白石詞五卷

范石湖云白石有裁雲縫月之妙手敲金戛玉之奇聲趙子固云白石詞家之申韓也

黃叔暘云白石詞極精妙不減清真其高處有美成所不能及

沈伯時云白石清勁

知音亦未免有生硬處

張叔夏云姜白石

如野雲孤飛去留無迹又云白石詞不惟清

虛且又騷雅讀之

使人神觀飛越

探春慢

過雪溪別鄭次臯諸君

衰草愁烟亂鴉送目飛沙迴旋平野拂雪金鞭欺寒茸
帽還記章臺走馬誰念漂零久謾贏得幽懷難寫故人
青盼相逢小窓間共情話長恨離多會少重訪問竹
西珠淚盈把鴈磧沙平漁汀人散老去不堪遊冶無奈

茗溪月又喚我扁舟東下甚日歸來梅花零亂春夜

一萼紅

人日登長沙定王臺

古城陰有官梅幾許紅萼未宜簪池面冰膠牆腰雪老
雲意還又沉沉翠藤共閒穿徑竹漸笑語驚起卧沙禽
野老林泉故王臺榭呼喚登臨南去北來何事蕩湘
雲楚水目極傷心朱戶黏雞金盤簇燕空歎時序侵尋
記曾共西樓雅集想垂柳還裊萬絲金待得歸鞍到時
只怕春深

揚州慢

淳熙丙申至
日過揚州

淮左名都竹西佳處解鞍少駐初程過春風十里盡齊
麥青青自邊馬窺江去後廢池喬木猶厭言兵漸黃昏
清角吹寒都在空城杜郎俊賞算如今重到須驚縱
豈寇詞工青樓夢好難賦深情二十四橋仍在波心蕩
冷月無聲念橋邊紅藥年年知為誰生

點絳脣

吳淞

燕鴈無心太湖西畔隨雲去數峯清苦商畧黃昏雨

第四橋邊擬共天隨住今何許凭欄懷古殘柳參差舞

暗香

石湖
詠梅

舊時月色算幾番照我梅邊吹笛喚起玉人不管清寒
與攀摘何遜而今漸老都忘却春風詞筆但怪得竹外
疎花香冷入瑤席江國正寂寂歎寄與路遙夜雪初
積翠尊易泣紅萼無言耿相憶長記曾携手處千樹壓
西湖寒碧又片片吹盡也幾時見得

疎影

前題

苔枝綴玉有翠禽小小枝上同宿客裏相逢籬角黃昏
無言自倚修竹昭君不慣胡沙遠但暗憶江南江北想
珮環月下歸來化作此花幽獨猶記深宮舊事那人
正睡裏飛近蛾綠莫似春風不管盈盈早與安排金屋
還教一片隨波去又却怨玉龍哀曲等恁時重覓幽香
已入小窓橫幅

張叔夏云暗香疎影二曲前
無古人後無來者真為絕唱

長亭怨慢

漸吹盡枝頭香絮是處人家綠深門戶遠浦縈迴暮帆

零亂向何許
閱人多矣誰得似
長亭樹樹若有情時不
會得青青如此
日暮望高城不見只見亂山無數
韋郎去也怎忘得玉環分付第一是早早歸來怕紅萼無人為主
算只有并刀難剪離愁千縷

齊天樂

蟋蟀

庾郎先自吟愁賦
淒淒更聞私語
露濕銅鋪苔侵石井
都是曾聽伊處
哀音似訴
正思婦無眠起
尋機杼曲曲
屏山夜涼獨自甚情緒
西窓又吹暗雨為誰頻斷續

相和砧杵候館吟秋離宮弔月別有傷心無數幽詩謾
與笑離落呼燈世間兒女寫入琴絲一聲聲更苦

張叔夏云

全章精粹所詠瞭然在目且不留滯於物

念奴嬌

荷花

開紅一舸記年時常與鴛鴦為侶三十六陂人未到水
佩風裳無數翠葉吹涼玉容消酒更灑菰蒲雨嫣然搖
動冷香飛上詩句日暮青蓋亭亭情人不見爭忍凌
波去只恐舞衣寒易落愁入西風南浦柳垂陰老魚

吹浪留我花間住田田多少幾回沙際歸路

湘月

即念奴嬌之
鬲指聲也

五湖舊約問經年底事長負清景暝入西山漸喚我一
葉夷猶乘興倦網都收歸禽時度月上汀洲冷中流容
與畫橈不點清鏡誰解喚起湘靈烟鬟霧鬢理哀絃
鴻陣玉塵談玄歎坐客多少風流名勝暗柳蕭蕭飛星
冉冉夜久知秋信鱸魚應好舊家樂事誰省

淡黃柳

合肥

空城曉

一作畫

角吹入垂楊陌馬上單衣寒側側看盡鴛

黃嫩綠都是江南舊相識

正岑寂明朝又寒食強携

酒小橋宅怕梨花落盡成秋色燕燕飛來問春何在惟有池塘自碧

側犯

芍藥

恨春易去甚春却向揚州住微雨正繭栗梢頭弄詩句
紅橋二十四總是行雲處無語漸半脫宮衣笑相顧

金壺細葉千朵圍歌舞誰念我鬢成絲來此共尊俎後

日西園綠陰無數寂寞劉郎自脩花譜

惜紅衣

荷花

枕簟邀涼琴書換日睡餘無力細灑冰泉并刀破甘碧
牆頭喚酒誰問訊城南詩客岑寂高樹晚蟬說西風消
息虹梁水陌魚浪吹香紅衣半狼籍維舟試望故國
渺天北可惜渚邊沙外不共美人遊歷問甚時同賦三
十六陂秋色

琵琶仙

吳興

雙槳來時有人似舊曲桃根桃葉歌扇輕約飛花蛾眉
正奇絕春漸遠汀洲自綠更添了幾聲啼鴂十里揚州
三生杜牧前事休說又還是宮燭分烟奈愁裏匆匆
換時節都把一襟芳思與空階榆莢千萬縷藏鴉細柳
為玉尊起舞迴雪想見西出陽關故人和別

淒涼犯

合肥
秋夕

綠楊巷陌西風起邊城一片離索馬嘶漸遠人歸甚處
戍樓吹角情懷正惡更哀草寒烟淡薄似當時將軍部

曲迤邐度沙漠 追念西湖上小舫携歌晚花行樂舊
游在否想如今翠凋紅落謾寫羊裙等新鴈來時繫著
怕匆匆不肯寄與悞後約

翠樓吟

武昌安
遠樓成

月冷龍沙塵清虎落今年漢酺初賜新翻邊地曲聽
毬幕元戎歌吹層樓高峙看檻曲紫紅簷牙飛翠人姝麗
粉香吹下夜寒風細 此地宜有神仙擁素雲黃鶴與
君游戲玉梯凝望久歎芳草萋萋千里天涯情味仗酒

後清愁花消英氣西山外晚來還捲一簾秋霽

法曲獻仙音

張彥遠
官舍

虛閣籠寒小簾通月暮色偏宜高處樹隔離宮水平馳
道湖山盡入尊俎奈楚客淹留久砧聲帶愁去屢回
顧過秋風未成歸計誰念我重見冷楓紅舞喚起淡妝
人問逋仙今在何許象筆鸞箋甚而今不道秀句怕平
生幽恨化作沙邊烟雨

眉嫵

戲張
仲遠

看垂楊連苑杜若吹沙愁損未歸眼信馬青樓去重簾
下娉婷人妙飛燕翠尊共款聽艷歌郎意先感便携手
月地雲堦裏愛良夜微煖無限風流疎散有暗藏弓
履偷寄香翰明月聞津鼓湘江上催人還解春纜亂紅
萬點悵斷魂烟水遙遠又爭似相携乘一舸鎮長見

石湖仙

寄石湖處士

松江烟浦是千古三高游衍佳處須信石湖仙似鴟夷
翩然引去浮雲安在我自愛綠香紅嫵容與看世間幾

度今古 盧溝舊曾駐馬為黃花間吟秀句見說邊頭
也學綸巾歌羽玉友金焦玉人金縷緩移箏柱聞好語
明年定在槐府

解連環

玉鞍重倚却沉吟未上又縈離思為大橋能撥春風小
喬妙携箏鴈啼秋水柳怯雲鬆更何必十分梳洗道郎
携羽扇那日隔簾半面曾記 西窓夜涼雨霽歎幽歡
未足何事輕棄問後約空指薔薇算如此溪山甚時重

至水驛燈昏又見在曲屏近底念惟有夜來皓月照伊
自睡

八歸

湖中送
胡德華

芳蓮墜粉疎桐吹綠庭院暗雨乍歇無端抱影銷魂處
還見篠牆螢暗鮮階蛩切送客重尋西去路問水面琵琶誰撥最可惜一片江山總付與啼鴂長恨相從未
款而今何事又對西風離別渚寒烟淡棹移人遠縹緲
行舟如葉想文君望久倚竹愁生步羅襪歸來後翠尊

雙飲下了珠簾玲瓏間看月

玲瓏四犯

越中歲暮

疊鼓夜寒垂燈春淺勿勿時事如許倦遊歡意少俛仰
悲今古江淹又吟恨賦記當時送君南浦萬里乾坤百
年身世惟有此情苦揚州柳垂官路有輕盈換馬端
正窺戶酒醒明月下夢逐潮聲去文章信美知何用謾
贏得天涯羈旅教說與春來要尋花伴侶

陸游

字務觀山陰人以蔭補登仕郎隆興初賜進士出身范成大帥蜀為參議官人譏其頽放

因自號放翁嘉泰初詔同修國史
升寶章閣待制有劍南集詞二卷

劉潛夫云放翁稼軒一掃纖艷不事斧鑿高則高矣但時時掉書袋要是一癖

南鄉子

歸夢寄吳檣水驛江程去路長想見芳洲初繫纜斜陽
烟樹參差認武昌愁鬢點新霜曾是朝衣惹御香重
到故鄉交舊少淒涼却恐他鄉勝故鄉

好事近

湓口放船歸薄暮散花洲宿兩岸白蘋紅蓼映一簑新

綠有沽酒處便為家菱芡四時足明日又乘風去任
江南江北

朝中措

怕歌愁舞懶逢迎妝晚託春醒總是向人深處當時枉
道無情關心近日啼紅密訴剪綠深盟杏館花陰恨
淺畫堂銀燭嫌明

又

鼕鼕儻鼓餞流年燭焰動金船綵燕難尋前夢酥花空

點春妍 文園謝病蘭成久
旅回首淒然明月梅山笛
夜和風禹廟鶯天

水龍吟

春日游
摩訶池

摩訶池上追游路紅綠參差春晚韶光妍媚海棠如醉
桃花欲暖挑菜初間禁烟將近一城絲管看金鞍爭道
香車飛蓋爭先占新亭館惆悵年華暗換黯銷魂雨
收雲散鏡奩掩月釵梁拆鳳秦箏斜鴈身在天涯亂山
孤壘危樓飛觀歎春來只有楊花和恨向東風滿

采桑子

寶釵樓上妝梳晚，懶上秋千。閒撥沉烟，金縷衣寬睡髻偏。
鱗鴻不寄遼東信，又是經年。彈淚花前，愁入春風十四絃。

漁家傲

寄仲高

東望山陰何處是，往來一萬三千里。寫得家書空滿紙。
流清淚，書回已是明年事。寄語紅橋橋下水，扁舟何日尋兄弟。
行遍天涯真老矣。愁無寐，鬢絲幾縷茶烟裏。

極相思

江頭疎雨輕烟寒食落花天翻紅墜素殘霞暗錦一段
淒然惆悵東君堪恨處也不念冷落尊前那堪更看
漫空相趁柳絮榆錢

雙頭蓮

呈范至能待制

華髮星星驚壯志成虛此身如寄蕭條病驥向暗裏消
盡當年豪氣夢斷故國山川隔重重烟水身萬里舊社
凋零青門俊遊誰記盡道錦里繁華歎官閒晝永柴

荆添睡清愁自醉念此際付與何人心事縱有楚柁吳
檣知何時東逝空悵望鱸美菰香秋風又起

鵲橋仙

華燈縱博雕鞍馳射誰記當年豪舉酒徒一半取封侯
獨去作江邊漁父輕舟八尺低篷三扇占斷蘋洲烟
雨鏡湖元自屬閒人又何必官家賜與

又

夜聞杜鵑

茅簷人靜蓬窓燈暗春晚連江風雨林鶯巢燕總無聲

但月夜常啼杜宇 催成清淚驚殘孤夢又揀深枝飛
去故山猶自不堪聽況半世飄然羈旅

感皇恩

小閣倚秋空下臨江渚漠漠孤雲未成雨數聲新鴈回
首杜陵何處壯心空萬里人誰許 黃閣紫樞築壇開
府莫怕功名欠人做如今熟計只有故鄉歸路石帆山
脚下菱三畝

沁園春

三榮橫谿
閣小宴

粉破梅梢綠動，萱叢春意已深。漸珠簾低捲，筇枝微步，
冰開躍鯉。林暖鳴禽，荔子扶疎，竹枝哀怨。濁酒一尊，和
淚斟凭欄久，歎山川冉冉，歲月駸駸。當時豈料如今，
謾一事無成，霜鬢侵看。故人強半沙堤黃閣，魚懸帶玉，
貂映蟬金。許國雖堅，朝天無路，萬里淒涼誰寄。音東風
裏，有灞橋烟柳，知我歸心。

又

一別秦樓轉眼，新春又近。放燈憶盈盈倩，笑纖纖柔握。

雪香花語玉暖酥凝念遠愁腸傷春病思自怪平生殊
未曾君知否漸香消蜀錦淚漬吳綾難求繫日長繩
况倦客飄零少舊朋但江郊鴈起漁村笛遠寒缸委燼
孤硯生冰水繞山圍烟昏雲慘縱有高臺常怯登消魂
處是魚箋不到蘭夢無憑

真珠簾

山村水館參差路感羈海正似殘春風絮掠地穿簾知
是竟歸何處鏡裏新霜空自憫問幾時鸞臺鰲署遲暮

謾憑高懷遠書空獨語 自古儒冠多誤悔當年早不
扁舟歸去醉下白蘋洲看夕陽鷗鷺菰菜鱸魚都棄了
只換得青衫塵土休顧早收身江上一簑烟雨

陳亮

字同父永康人淳熙中詣闕上書孝宗欲官之亟渡江歸至光宗策進士置第一授僉書

建康府判官歷公事未至官而卒
端平初謚文毅有龍川集詞一卷

水龍吟

闌花深處層樓畫簾半捲東風軟春歸翠陌平沙茸嫩
垂楊金淺遲日催花淡雲閣雨輕寒輕暖恨芳菲世界

游人未賞都付與鶯和燕
寂寞憑高念遠向南樓一
聲歸鴈金釵鬪草青絲勒馬風流雲散羅綬分香翠綃
封淚幾多幽怨正銷魂又是疎烟淡月子規聲斷

洞仙歌

秋雨追次
李元膺韻

瑣窓秋暮夢高唐人因獨立西風萬千恨又簷花落處
滴碎空堦芙蓉怨無限秋容老盡 枯荷催欲折多少
離聲鎖斷天涯訴幽悶似蓬山去後方士來時揮粉淚
點點梨花香潤斷送得人間夜霖鈴更落葉梧桐孤燈

成暈

虞美人

東風蕩颺輕雲縷時送瀟瀟雨水邊臺榭燕新歸一點
香泥濕帶落花飛 海棠糝徑鋪香繡依舊成春瘦黃
昏庭院柳啼鴉記得那人和月折梨花

劉過

字改之襄陽人一云太和人有龍洲詞一卷

黃叔暘云改之稼軒之客詞多壯語蓋學稼軒者也 陶九成云改之造詞贍逸有思致沁園春二首尤纖麗可愛

賀新郎

贈鄉人
朱唐卿

多病劉郎瘦最傷心天寒歲晚客他鄉久大舸翩翩何
許至元是高陽舊友便一笑相歡攜手與問武昌城下
月又何如楊子江頭柳追往事兩眉皺燭花自剪明
如晝喚青蛾小紅樓上殷勤勸酒昵昵琵琶恩怨語春
筍輕籠翠袖看舞徹金釵微溜若見故鄉吾父老道長
安市上強如舊重會面幾時又

又

去年秋余試牒四明賦贈老娼至今天下與
禁中皆歌之江西人來以為鄧南秀詞非也

老去相如倦向文君說似而今怎生消遣衣袂京塵曾
染處空有香紅尚軟料彼此魂銷腸斷一枕新涼眠客
舍聽梧桐疎雨秋風顫燈暈冷記初見樓低不放珠
簾捲晚妝殘翠蛾狼籍淚痕流臉人道愁來須殢酒無
奈愁深酒淺但託意焦琴紈扇莫鼓琵琶江上曲怕荻
花楓葉俱淒怨雲萬疊寸心遠

又
西湖

睡覺啼鶯曉醉西湖兩峯日日買花簪帽去盡酒徒無

人問惟有玉山自倒任拍手兒童爭笑一舸乘風翩然
去避魚龍不見波聲悄歌韻遠喚蘇小 神仙路遠蓬
萊島紫雲深參差禁樹有烟花遶人世紅塵西障日百
計不如歸好付樂事與他年少費盡柳金梨雪句問沉
香亭北何時召心未愜鬢先老

清平樂

新來塞北傳到真消息赤地居民無一粒更五單于爭
立 維師尚父鷹揚熊羆百萬堂堂看取黃金假鉞歸

來異姓真王

唐多令

重過
武昌

蘆葉滿汀洲，寒沙帶淺流。二十年重過南樓，柳下繫船
猶未穩，能幾日，又中秋。黃鶴斷磯頭，故人曾到否？舊
江山，渾是新愁。欲買桂花同載酒，終不似、少年遊。

又
梅

解纜蓼花灣，好風吹去帆。二十年重過新灘，洛浦凌波
人去後，空夢繞翠屏間。飛霧濕征衫，蒼蒼烟樹寒望。

星河低處長安綺陌紅樓應笑我為花事過江南

沁園春

美人足

洛浦凌波為誰微步輕生暗塵記踏花芳徑亂紅不損
步苔幽砌嫩綠無痕襯玉羅慳銷金樣窄載不起盈盈
一段春嬉游倦笑教人款捻微褪些跟 有時自度歌
勻悄不覺微尖點拍頻憶金蓮移換文鴛得侶繡茵催
袞舞鳳輕分懊恨深遮牽情半露出沒風前烟縷裙知
何似似一鉤新月淺碧籠雲

又

美人
指甲

銷薄春冰碾輕寒玉漸長漸灣見鳳鞋泥污偎人強別
龍涎香斷撥火輕翻學撫瑤琴時時欲剪更掬水魚鱗
波底寒纖柔處試摘花香滿鏤棗成斑時將粉淚偷
彈記綰玉曾教柳傅看算恩情相著搔便玉體歸期暗
訴劃遍闌干每到相思沉吟靜處斜倚朱脣皓齒間風
流甚把仙郎暗掐莫放春閒

行香子

山水
扇面

佛寺雲邊茅舍山前樹陰中酒旆低懸峯巒空翠溪水
清漣只欠桃花欠沙鳥欠漁船無限風烟景趣天然
最宜他隱者盤旋何人村墅若個林泉恰似敵湖似方
口似斜川

楊炎

號止濟翁廬陵人
有西樵語業一卷

鵲橋仙

思歸時節乍寒天氣總是離人愁緒夜來無奈被西風
更吹做一簾秋雨征衫拂淚闌干倚醉羞對黃花無

語寄書除是鴈來時又只恐書成鴈去

蝶戀花

別范南伯

離恨做成春夜雨添得春江剗地東流去弱柳繫船都
不住為君愁絕聽鳴榔君到南徐芳草渡想得尋春
依舊當年路後夜獨憐回首處亂山遮莫無重數

又

稼軒坐間作首句
用丘六書中語

點檢笙歌多釀酒不放東風獨自迷楊柳院院翠陰停
永晝曲欄隨處堪垂手昨日解醒今夕又消得情懷

長被春僝僽門外馬嘶人去後亂紅不管花消瘦

秦樓月

東風寂垂楊舞困春無力春無力落紅不管杏花狼籍
斷腸芳草萋萋碧新來怪底相思極相思極冷烟池
館又將寒食

水調歌頭

把酒對斜日無語問西風胭脂何事都做顏色染芙蓉
放眼暮江千頃中有離愁萬斛無處落征鴻天在闌干

角人倚醉醒中 千萬里江南北浙西東吾生如寄尚
想三徑菊花叢誰是中州豪傑借我五湖舟楫去作釣
魚翁故國且回首此意莫匆匆

滿江紅

筆染相思暗題盡朱門白壁動離思春生遠岸烟銷殘
日楊柳結成羅帶恨海棠染就胭脂色想深情幽怨繡
屏間雙鷺瀟瀟 春水綠春山碧花有恨人無力對一奩
愁思十分孤寂寸寸錦腸渾欲斷盈盈玉淚應偷滴倩

東風吹鴈過江南傳消息

張

輯

字宗瑞鄱陽人有東澤綺語債二卷

朱湛盧云東澤得詩法於姜堯章世謂謫仙復作不知其又能詞也

疎簾淡月

寓桂枝香

梧桐雨細漸滴做秋聲被風驚碎潤逼衣篝線裊蕙爐
沉水悠悠歲月天涯醉一分秋一分憔悴紫簫吹斷素
箋恨切夜寒鴻起又何苦淒涼客裏負草堂春綠竹
溪空翠落葉西風吹老幾番塵世從前諳盡江湖味聽

商歌歸興千里露侵宿酒疎簾淡月照人無寐

如此江山

寓齊天樂

西風揚子江頭路扁舟雨晴呼渡岸隔瓜洲津橫蒜石
搖盡波聲千古詩人一去但對峙金焦斷磯青樹欲下
斜陽長淮渺渺正愁予中流笑與客語把貂裘為浣
半生塵土品水烹茶看碑憶鶴恍似舊曾游處聊憑陸
謂問八極神游肯重來否如此江山更蒼烟白鷺

釣船笛

寓好事近

載酒岳陽樓，秋入洞庭深。碧極目，水天無際正白蘋。風
急月明不見宿鷗驚。醉把玉欄拍，誰謂百年心事恰
釣船橫笛。

月當窓

寓霜天
曉角

看朱成碧，曾醉梅花側。相遇匆匆相別又爭似不相識。
南北千里，隔幾時重見得。最苦子規啼處一片月當
窓白。

山漸青

寓長
相思

山無情水無情楊柳飛花春雨晴征衫長短亭 擬行

行重行行行

一作吟

到江南第幾程江南山漸青

碧雲深

寓憶秦娥

風淒淒井欄絡緯驚秋啼驚秋啼涼侵好夢月正樓西
卷簾望月知心誰關河空隔長相思長相思碧雲暮
合有美人兮

南浦月

寓點絳脣賦蒲湘漁父

來剪尊絲江頭一陣鳴簷雨孤篷歸路吹得蘋風暮

短髮蕭蕭笑與沙鷗語休歸去玉龍嘶處邀月過南浦

沙頭雨

寓點絳脣

帶醉歸時月華猶在吹簫處曉愁情緒忘却匆匆語

客裏風霜詩鬢空如許江南去岸花迎櫓遙隔沙頭雨

花自落

寓謁金門

春寂寞簾低蕙爐烟薄聽盡歸鴻書怎託相思天一角

象筆鸞箋閒却秀句與誰商畧睡起愁懷何處著無

風花自落

垂楊碧

寓謁金門


花半濕睡起一窓晴色千里江南真咫尺醉中歸夢直
前度蘭舟送客雙鯉沉沉消息樓外垂楊如此碧問
春來幾日

闌干萬里心

寓憶王孫

小樓柳色未春深湘月牽情入苦吟翠袖風前冷不禁
怕登臨幾曲闌干萬里心

詞綜卷十五



總校官庶吉士臣張能照
校對官中書臣潘庭筠
謄錄監生臣馮曰琮